



Federacija Bosne i Hercegovine
FEDERALNO MINISTARSTVO FINANSIJA
FEDERALNO MINISTARSTVO FINANSIJA

Ime i prezime	Klasifikaciona oznaka	Redni broj	Broj priloga
		20-12-2022	

Sindikata policijskih službenika Federalne uprave policije

Broj : 65 /22

Datum : 20.12.2022. godine.

VLADA FEDERACIJE BOSNE I HERCEGOVINE
KABINET PREMIJERA
N/R PREMIJERA
gosp. Fadil Novalić

FEDERALNO MINISTARSTVO UNUTRAŠNJIH POSLOVA
N/R MINISTRA, gosp. Aljoša Čampara

FEDERALNO MINISTARSTVO FINANSIJA
N/R MINISTRA, gospođa Jelka Miličević

FEDERALNO MINISTARSTVO PRAVDE
N/R MINISTRA, gosp. Mato Jozić

PREDMET : Dopis - INFORMACIJA , d o s t a v l j a s e :

Poštovani,

Upravni odbor Sindikata policijskih službenika Federalne uprave policije ima za obavezu da u ime svih članova sindikata i naših uvaženih kolega, policijskih službenika Federalne uprave policije upozna Vas o gorućim problemima i zatraži od Vas djelovanje u skladu sa vašim ovlastima.

Žalim što Vam ovim aktom nećemo pisati o uspjesima koji krase Federalnu upravu policije, a za koje su zaslužni policijski službenici, a još više žalimo što smo prinuđeni da svoje probleme sa kojima se svakodnevno susrećemo kao policijski službenici FUP-e iznosimo na ovaj način.

Federalna uprava policije, koja trenutno broji cca 600 (šest stotina) policijskih službenika, jedini je federalni organ uprave sa policijskim ovlaštenjima, kojem je Vlada FBiH poslodavac.

Da li ste znali da su finansijska primanja policijskog službenika FUP-e u 2008. godini bila znatno veća u odnosu na danas, veća za otprilike 30 posto ? Stopa inflacije od prošle godine do današnjeg dana iznosi 17,3 %, te se zaključak nameće sam.

Da li ste upoznati da smo jedina policijska agencija u državi i regionu koja nema potpisan kolektivni ugovor za policijske službenike, koji je zakonodavac predvidio da bi se određenim kategorijama zaposlenika zbog specifičnosti njihovog zanimanja dalo više od zakonskog minimuma, dok policijski službenici FUP-e u određenim slučajevima nemaju čak ni zakonski minimum. Kao primjer navodimo da je Zakonom o radu FBiH predviđeno da svaki zaposlenik ima pravo na zakonski minimum od 20 dana za korištenje godišnjeg odmora, dok se u Federalnoj upravi policije primjenjuje zastarjeli i neusklađeni lex specialis Zakon o policijskim službenicima FBiH, po osnovu kojeg policijski službenici koji zasnivaju radni odnos ili su u radnom odnosu ne duže od tri godine ostvaruju pravo na 18 dana godišnjeg odmora. Poraznija je činjenica da u istoj instituciji naše kolege državni službenici i namještenici po važećem kolektivnom ugovoru ostvaruju pravo na godišnji odmor do 36 dana u toku kalendarske godine, a policijski službenik maksimalno može ostvariti 30 dana godišnjeg odmora. Ne, nismo ljubomorni na naše kolege, ali smo oštećeni.

Da li znate da su plate i ostala materijalna primanja policijskih službenika znatno veća u kantonalnim ministarstvima, državnim policijskim agencijama i sudskoj policiji FBiH u odnosu na nas. Da se pogrešno ne shvatimo, mi nismo ljubomorni na naše kolege iz gore navedenih policijskih agencija, naprotiv srećni smo zbog njih, ali bi bili zadovoljni kada bi imali isti obim prava. Na ovaj način se šalje svojevrsna poruka da se na policijske službenike FUP-e ne računa, naš status je devalviran u svakom segmentu, zaboravljeni smo od svih i prepušteni sami sebi.

Da li znate da se samo u Federalnoj upravi policije ne vrši isplata prekovremenog rada, propisana Zakonom o policijskim službenicima FBiH u članu 90. Sigurno ne znate da je u Federalnoj upravi policije zamjenik direktora izdao uredbu o prekovremenom radu, koju je propisao kao obligatornu, a u kojoj se naređuje da se neće vršiti isplata prekovremenog rada propisana članom 90. Zakona o policijskim službenicima FBiH. Naše kolege, policijski službenici u gore pomenutim agencijama nemaju probleme ove prirode, pa ni u sudskoj policiji FBiH čiji je poslodavac i finansijer Vlada FBiH.

Da li ste znali da policijski službenik uvećanje po osnovu minulog rada ostvaruje samo na efektivnu godinu, a ne i na benifitnu godinu radnog staža, te tako policijski službenik FUP-e u penziju ide sa ostvarenim maksimalno 15% uvećanja na minuli radni staž, dok državni službenici i namještenici u našoj instituciji penziju dočekaju sa 20 % uvećanja po osnovu minulog rada. Postavlja se pitanje da li je benificija policijskog službenika uistinu privilegija ili teret. Na ovaj način utvrđenim obračunom plate u pogledu minulog rada pravi se znatna šteta policijskom službeniku i umanjuje njegovo pravo i vrijednost. Da ne bi bilo zabune ovaj svojevrsan apsurd se dešava samo u Federalnoj upravi policije, u cijeloj Bosni i Hercegovini, ni u jednoj drugoj policijskoj agenciji to nije slučaj. Policijski službenici FUP-e su prinuđeni ta ista prava potraživati pred nadležnim sudovima, u dugim i skupim parničnim procesima. Koja se poruka šalje policijskim službenicima FUP-e ?

Da li ste znali da se policijskim službenicima FUP-e minuli rad obračunava na 60% ostvarene plate, a pripadnicima specijalne policijske jedinice FUP-e na 50% plate. Naime naknada na minuli rad obračunava se na osnovni koeficijent policijskog službenika, a ne na ukupni koji podrazumijeva dodatak na ovlaštenja. Ovakav način obračuna navedenog nije u korist policijskog službenika, dok u drugim policijskim agencijama se ide u korist policijskog službenika.

Da li ste znali da se u Federalnoj upravi policije vrši segregaciju policijskih službenika na način da policijski službenici koji rade u turnusima imaju naknadu za noćni rad, dok policijski službenici koji ne rade u turnusima, a upućuju se na izvršenje poslova i zadataka u vrijeme koje je zakonom propisano kao noćni rad, nemaju naknadu za noćni rad (od 22 do 07) ? Oni koji tumače pravo, isto crpe iz pravilnika koji egzistira iz 2005. godine, zvuči nevjerovatno, zar ne ?

Da li ste znali da svi uposlenici Vlade Federacije Bosne i Hercegovine, osim onih u statusu policijskog službenika imaju pravo da ostvare na ime bolesti ili smrti užeg člana porodice jednokratnu novčanu pomoć bez obzira da li su u zajedničkom domaćinstvu i prijavljeni na istoj adresi. Da li je to dopustivo u demokratsko orijentisanom društvu, gdje su jednaka prava zagarantovana ustavom.

Da li ste znali da policijski službenici FUP-e odlaze u penziju, a da im se ne dodjeljuje u vlasništvo službeno oružje, koje su dužili dugi niz godina. Tokom radnog vijeka izloženi smo radu sa licima koja su od opasnosti po zakonom zaštićena dobra i vrijednosti, ista lišavamo slobode, izlažemo se opasnosti, a odlaskom u penziju prestajete biti policajac. Iako penzionisanjem prestaje status policijskog službenika mi se vodimo parolom "Jednom policajac, uvijek policajac". U Federalnoj upravi policije praksa i nepisano pravilo do unazad četiri godine bilo je da policajac po penzionisanju zadržava službeno oružje. Obzirom da nije

bilo izmjena i dopuna zakona koji regulišu ovu oblast, nameće se pitanje kako se oružje dodjeljivalo do 2018. godine, odnosno kako se sada ne dodjeljuje, da li se ranije kršio zakon ili se sada krši, što do sada nije ispitano, niti utvrđeno. Mi prihvaćamo činjenicu da možda nije moguće rashodovati ispravno sredstvo i pokloniti ga policijskom službeniku, ali se ne možemo pomiriti sa činjenicom da do sada niste izvršili izmjene Pravilnika o nagradama, te istim omogućili da se po odlasku u penziju policijskom službeniku dodjeljuje nagrada „pištolj“ za doprinos u oblasti sigurnosti. Savjesnim i časnim obavljanjem svog poziva policijski službenik je u sukobu sa osobama sa druge strane zakona. Odlaskom u penziju taj odnos ne prestaje ni za njega, niti za njegovu porodicu čega je svako od nas svjestan. Poruku iz navedenog procijenite sami.

Da li znate da pojedine policijske agencije, kao konkretan primjer ćemo navesti MUP KS, koji policijskim službenicima na poslovima i zadacima u civilnoj odjeći, odobravaju novčana sredstva za kupovinu civilne odjeće i obuće na godišnjem nivou. Navedeno je utemeljeno po osnovu što se uniformisanim policijskim službenicima o trošku poslodavca nabavlja i dodjeljuje uniforma i njeni sastavni dijelovi. Nažalost po nas, to nije praksa u FUP-e.

Poštovano gospodo, moguće je da za ove navode do današnjeg dana niste znali, ali od danas smatramo da ste sa gore navedenim upoznati.

Uvaženi naslove, policijski službenici FUP-e dužni su svojim životima štiti Ustav BiH, Ustav FBiH, štiti živote i imovinu građana FBiH, štiti ustanove i osobe od značaja za FBiH, dužni su časno i pošteno obavljati sve poslove i zadatke koji su u našoj nadležnosti. Postavljamo pitanje: **“Ko je zadužen da štiti NAS policijske službenike od nepovoljnih uslova rada, od segregacije, od svjesnog umanjivanja prava i kršenja zakona nad nama, od loše opremljenosti, od socialno-ekonomske ovisnosti?”**

Mislimo da su uskraćena prava policijskih službenika FUP-e u proteklom periodu nanijela veliku štetu budžetu FBiH, jer Vlada FBiH ima za obavezu ili je već isplatila ogromne novce po osnovu sudskih presuda, troškova postupka, zakonskih kamata i sl. proisteklih iz kršenja zakonom zagarantovanih prava. Nažalost mi smo “osuđeni” da svoja prava iz radnih odnosa ostvarujemo pred nadležnim sudovima.

Ovaj dopis shvatite kao demokratski poziv za pomoć, još uvijek imamo strpljenja i razumjevanja, ali također imamo i granice jer i policijski službenik je “na kraju dana” samo ljudsko biće, a ne robot !!!!

Za tvrdnje iznese u ovom dopisu možemo ponuditi konkretne dokaze i pojašnjenja ukoliko ocijenite za potrebno, a iste i sami možete pribaviti.

O materijalno - tehničkoj “ne”opremljenosti sa osnovnim sredstvima nepodnim za rad, kao i uvjetima za rad policijskih službenika Federalne uprave policije (uniforme, čizme, panciri, oprema za javni red i mir, specijalistička oprema, ljekarski pregledi, investicije, nabavke, edukacije, specijalističke obuke i drugo) bit ćete u skorijem vremenskom periodu obaviješteni.



PREDSJEDNIK UPRAVNOG ODBORA

[Signature]
Aldin Sinanović

Telefon broj: 387 60/33 70 602

Email: sindikatsfup@gmail.com

Transakcijski broj računa: 1346101008518326

ID broj: 4203084780009